

Ekalesia Faapotopotoga Kerisiano Samoa



TUSI AU LEOLEO
2021



Ia Tatou Tatalo

Tusi Au Leoleo 2021

Upu Tomua

E ta matasila le Matuaofaiva, ae atu le Taufalemau, e taliu foi le Tauta, ae popo'e le Tautai. O ata na o popolega o loo feagai nei ma le lalolagi aemaise o le fanau a tagata i mala ma puapuaga, ona o le o'o mai o le faama'i ua maumau ai le tele o soifua, ma aafia ai le maloloina o tagata.

Peitai, e tua le pouliuli i le la oso, o i'u ia o la outou tatalo le paia i le Ekalesia, e totego ai pea malama i le soifua faatuatua ma le ola talitonu i le tatalo, e maua ai le malosi lilo e foia ai faafitauli o loo faatalitali mai. Faamalo le tatalo.

Avea foi lenei itula e momoli ai le agaga fa'afetai o le Susuga i le Peresetene ma lau Komiti o le Au Leoleo, ona o le maau o le Ekalesia e ala i le taulaga o lena tausaga. Tau ia ina nanamu ma sasala i fofoga o le Atua la outou osiga taulaga ona o lana feau. Ao lenei ua maea tapena la tatou tusi tatalo mo lenei tausaga fou. O le maau faa-le-agaga o le Au uso Faifeau ia Peteru Taula FS na saunia Ianuari ia Iulai, ma Denny Epati FS na saunia Iulai e oo ia Tesema. E momoli ai le agaga Faafetai o le Komiti ona o le tamaoaiga, ia liua e le Alii e fai o ni seuseu mo le magalafu o le soifua tatalo o lana Ekalesia.

Ia faamanuia le Atua i le Ekalesia aoao, ma ia manuia tele lau tatalo o lenei tausaga.

Soifua

Uili Konelio Teo

Failautusi Komiti Au Leoleo

03 – 09 Ianuari 2021

(Vaiaso Tausaga Fou 2021)

Tusi Faitau: Efeso 1:3-6

Manatu Autu: “O le finagalo alofa o le Atua ua iloatino ia Iesu
Keriso:

(God’s mercy manifests in Jesus Christ)

Faafetai:

Ona o lona alofa tunoa, ua tatou aulia mai ai lenei tausaga fou. O le finagalo alofa o le Atua i le fanau a tagata, ua saunia ai le togiola e pei ona faalia ia Iesu Keriso. Mo ona manuia le faatuaioia mo le lalolagi uma.

Faatoesega:

Ua le fia malamalama le tagata i le finagalo alofa o le Atua. Ua le auauna le tagata mo le viiga o le Atua, ae mo ia lava. Ua tatou le faaogaina tatau taleni ma meaalofo a le Atua mo le manuia o isi tagata.

Manaoga:

Ia saga faailoa mai pea lona finagalo alofa. Ia mafutaina pea i tatou e le Agaga Paia, tatou te mafaia ai mea lelei mo le viiga o le Atua. Ia faasino ala lona alofa tunoa i le amataga o le folauga o lenei tausaga fou, e manuia ai Samoa ma ona tagata.

10 – 16 Ianuari 2021

Tusi Faitau: Galuega 8 : 14 – 17

Manatu Autu : “Agaga Paia....Faailoga o le malosi fou:
(Holy Spirit! Symbol of new power)

Faafetai:

I le faatasi mai o le Agaga Paia i taimi uma. Ona o faaaliga eseese o le Agaga Paaia, ua foaiina mai ai faamanuiaga mo le lalolagi.

Faatoesega:

Ona ua tatou faatino o tatou tiute i so tatou potou ma se iloa, a ua le fesili i le faasinoga a le Agaga Paia. Ua le fiafia nisi o le au Kerisiano i le galulue faatasi, ona o le manatu faapito. Ona o le manatu faatauva'a i manu'a o le Agaga o le Atua.

Manaoga:

Ia maua pea le malosi Faafouina e ala i le mafuta mai o le Agaga Paia. Ia maua pea le agaga galulue faatasi o le au Kerisiano i le lalolagi. Ia iai le Agaga o le Alii i fonotaga a Komiti a le Ekalesia i lenei tausaga.

17 – 23 Ianuari 2021

Tusi Faitau: Ioane 2 : 1 – 11

Manatu Autu : “O le Mamalu o Keriso”
(The Glory of Christ)

Faafetai:

Ona ua ta'uamionuina i tatou i le mamalu o Keriso. E ui o loo tatou fiafia pea i tuinanauga o le lalolagi, ae le o va'oa ai le alofa mai pea o le Atua. i le galuega soofa'atasi a le Ekalesia i le lalolagi.

Faatoesega:

Ona o le femisa'i o le fanau a le Atua. ona o lo tatou ola femoumouai. Ona ua avea tofi e faamaualuluga ai ma loto fefete nisi, ae galo ai le viiga o le Atua.

Manaoga:

Ia maua le loto ma le agaga e tasi o le au Kerisiano i le lalolagi. Ia fesoasoani le Agaga Paia, e aveese le manatu faapito o tagata. Ia matua iloa le mamalu o Keriso i loto ma manatu o tagata, aua le viiga o le Atua.

24 -30 Ianuari 2021

(Aso Sa o Tupulaga)

Tusi Faitau: **Neemia 8 : 1 – 10**

Manatu Autu : **“Fiafia i le Alii”**
(Rejoice in the Lord)

Faafetai:

Ona o le alofa, ua aoao mai mo le lelei o le tagata. Ona o poloaiga a le Alii, o le faatonuga lea o le potu ma le faautatua. O le faaolataga na saunia e Iesu, o le fiafiaga sili lea mo e salamo ma faautatua.

Faatoesega:

Ua loto le toatele i faafiafiaga vave mavae, ae le o faafiafiaga faaleagaga. Ua le usitai le tagata i tulafono a le Atua e manuia ai. Ona o lo tatou le olaina o le tulafono o le alofa i aso uma o lo tatou ola.

Manaoga:

Ia faatumauina lo tatou fiafia i le faaolataga na saunia e Keriso. Ia faatumauina le fiafia i poloaiga ma tulafono a le Atua ma manatua pea le faaolataga. Ia manuia tupulaga o Samoa.

31 – 06 Fepuari 2021

Tusi Faitau: **Ieremia 1 : 4 – 10**

Manatu Autu : **“Na filifilia o Ia ia le fefe”**
(He was chosen not to be afraid)

Faafetai:

Ona o le loto talitonu i le Atua, ua le faavaivaia ai le talaiga. Ona o loo manumalo pea le lelei i le leaga, e ui lava ina vaaia suiga fou ua aafia ai tagata. Aua e faaecaina le loto maulalo.

Faatoesega:

Ua tatou le iloa ona tauave tiute ma tofi, faapei ona filifilia ai tatou. O le tosina o tatou loto i faosoosoga a le tiapolo, ae le o le amiotonu a le Atua. Ua vaoia avanoa mo le ola lelei o i sii manuia o le Atua, ona o lo tatou ola faamaualuga.

Manaoga:

Ia faailoa mai lana filifiliga tonu, tatou te le fefefe ai. Ia tatou faia pea lana amiotonu ma aoao mai ia tatou alolofa i o tatou tuaoi.

07 – 13 Fepuari 2021

Tusi Faitau: **Luka 5 : 1 – 11**

Manatu Autu : **“A valaauina, alu ma le loto”**
(Commit to your calling)

Faafetai:

O lo tatou valaauina i lana Ekalesia, mo taleni ma meaalofa, ua manuia ai ona tagata. O le finafinau ma le le solomuli o ana auauna faatuatua.

Faatoesega:

Ona o tatou vaivaiga faaletagata, e pei o le augata ma le faapalapala. O lo tatou ola masalosalo i faamanuiaga mai le Atua. Ua tatou mumusu e faalelei le ola fefulituaa’i.

Manaoga:

Ia fesoasoani mai le Agaga Paia i lo tatou valaauina. Ia tatou lototele e tetee atu i le manatu faapito. Ia maua le poto e faia ai a tatou faaiuga i le faatuatua.

14 – 20 Fepuari 2021

Tusi Faitau: Salamo 1

Manatu Autu : “**Filifiliga Sa’o**”
(*Right Choice*)

Faafetai:

O le mana o le Alii ua laveaiina i tatou mai filifiliga leaga. O aoaoga a le Tusi Paia ua tatou iloa ai, e manuia le filifili faatasi ma le Alii. O le manuia ua folafolaina mai, e ala ia Iesu Keriso.

Faatoesega:

Ona ua tutuli la tatou faalogo i le Atua, ua le lagona ai mea e manuia ai. Ona o lo tatou le lagonaina o le Agaga o le Atua. ona ua le o gatusa a tatou upu ma a tatou amio.

Manaoga:

Ia pa’i mai le Agaga Paia na te pulea ma faa’aupegaina o tatou loto. Ia a’oa’o mai lona Agaga Paia, ia tatou savavali i le auala tonu. Ia faa’aupegaina i tatou i aupega o lona finagalo paia.

21 – 27 Fepuari 2021

Tusi Faitau: Kenese 45 : 3 – 11

Manatu Autu: “**O le alofa faamagalo**”
(*Forgiving Love*)

Faafetai:

Ona o auala o loo faaalua ai le soifua manuia o ona tagata. O le galuega tauave a le Ekalesia mo le manuia o le Tala Lelei a Iesu Keriso, i le soifua o Iesu, ua tatou iloa ai le amiotonu ma le alofa o le Atua.

Faatoesega:

Ua le mafai ona tetee atu faaososoga, ua mafua ai fevaevaeai. Ona ua le mafai ona tuuese le loto ita ma le faailoga tagata. Ua tatou le fiafia e mulimuli i aoaoga a le Tusi Paia, ma le musumusuga a le Agaga Paia.

Manaoga:

Ia fesoasoani mai le Alii, ma aveeseina le loto leaga ma le faamaualuga. Ia fesoasoani mai le Alii, ia faamanuia mafutaga i le va o matua ma fanau, aua le maopoopoga o aiga. Ia fesoasoani mai le Alii ia tatou iloa, e lelei le alofa.

28 Fepuari – 06 Mati 2021

Tusi Faitau: Luka 9 : 28 – 35

Manatu Autu: “O lona mamalu ua pupula mai”
(His Glory shineth)

Faafetai:

Ona ua le natia lona mamalu i le tagata. O loo faaalua pea le mamalu o le Atua i taimi o tapuaiga ma sauniga lotu. I le Agaga Paia, ua na liliuina i tatou ia Iesu.

Faatoesega:

Ona o lo tatou le malamalama ia Iesu le Nasareta. O lo tatou le mataala faatasi ma le Alii, e ala i le tatalo. Ona o loo punitia pea la tatou vaai ia Keriso ma lona finagalo, ona o le agasala.

Manaoga:

Ia sulua pea lo tatou lalolagi pogisa i le pupula o Keriso. Tatou tatalo i le Atua, ia faamalosi mai lo tatou ola tatalo. Ia sulua o tatou loto i le malamalama o lona finagalo tonu, ia tatou mafuta ai pea ma la i le tatalo. Ia susulu malosi pea le malamalama o le Upu Moni, nei taitaiina sese i tatou i le pouliuli.

07 – 13 Mati 2021

Tusi Faitau: **Roma 10 : 8 – 13**

Manatu Autu: **“Tautino atu o Iesu le Faaola”**
(Confess Jesus is the Saviour)

Faafetai:

Ona ua faamalamalama mai e le Tusi Paia, le ala e faamama ai agasala a le lalolagi. Ona o le maliu ma le toetu o Iesu Keriso, ua saunia ai le faaolataga mo oe ma au.

Faatoesega:

Ona ua le mafai ona tatou tautino atu i le Atua, o tatou o tagata agasala. O lo tatou folafolaina o le loto salamo, ae le o faamaoni i ai. O lo tatou le manatu mamfa i le faaolataga na saunia e le Keriso. Ona ua māmā i o tatou loto puapuaga o le Alii.

Manaoga:

Ina ia moni lo tatou tautino o Iesu Keriso o le Alii ma le Faaola. Ina ia malamalama o tatou loto i le moni ma le faamaoni o puapuaga o Keriso. Ia fesoasoani mai le Agaga Paia, ia lagona e tagata uma le alofa ia Iesu.

14 – 20 Mati 2021

Tusi Faitau: **Filipi 3: 17 – 21**

Manatu Autu: **“Fofoaga fou ia Keriso”**
(New creation in Christ)

Faafetai:

O lona finagalo alofa i le tagata, na ia matua saili mai ai ia ola, e le gata i le olaga nei, ae oo i le ola e faavavau. Aua ua uma ona saunia le nuu matagofie i le lagi mo soo se kerisiano faatuatua. Ona o puapuaga o le Alii, ua Faafouina ai o tatou lagona.

Faatoesega:

Ona o lo tatou ola faatamala ma le le ola sauniuni, e mafuta faatasi ai ma le Alii i le ola faavavau. O lo tatou ola faapalapala ma le faafifilemu i le galueaina o le faamoemoe i le lagi, ua uma ona saunia e Iesu Keriso. O lo tatou le manatu mamafa i le alofa o Keriso, na ia faatoilaloina ai fili uma.

Manaoga:

Ia fesoasoani mai i lo tatou le nofo sauniuni, e fetaiai ma luitau o le ola. Ia aoaoina i tatou, ia tatou faatalitali atu mo le faasinoga a lou Agaga Paia.

21 – 27 Mati 2021

Tusi Faitau: **Luka 13 : 6 – 9**

Manatu Autu: **“O le toe avanoa”**
(Last Chance)

Faafetai:

O le agalelei le faatuaioia o le Alii, ua ia le tau mai ai i tatou e tusa ma a tatou amioletonu. O le alofa faifai pea o le Alii ua tatou manuia ai. O le Tala Lelei folafola, ua tatou maua ai le suiga fou i le ola auauna i le Atua.

Faatoesega:

Ua tatou iloa le Atua alofa, a ua tatou fai pea le agasala. Ua tatou le lagona le alofa tuu avanoa o le Atua.

Manaoga:

Ia faamalosi mai i lo tatou ola saili atu ia te Ia. ia fesoasoani mai i le vaivai o lo tatou ola galulue. Laveai mai ia te i matou ai faaosoosoga.

28 Mati – 03 Aperila 2021
Lelei

Aso Sa Laupama/Aso Faraile

Tusi Faitau: **Luka 19 : 28 – 40**

Manatu Autu: **“Ua afio mai le Tupu o tupu”**
(The King of all kings comes)

Faafetai:

Mo le Aso Sa o le Laupama, e faamanatu mai lou afio mai. I le Tupu o tupu, ua na faataunuaina valoaga o le faaolaina o le tagata agasala. I le Agaga Paia, ua na tafieseā le loto masalosalo i le Tupu o tupu.

Faatoesega:

Ua le taua i o tatou loto le Aso Sa o le Laupama. Ona ua tatou le malamalama i le uiga moni o le afio mai o le Tupu o tupu. Ona ua tatou le iloa le Tupu o tupu.

Manaoga:

O le agalelei le faatuaōia o le Alii, ua ia le tauī mai ai i tatou e tusa ma a tatou amioletonu. O le alofa faifai pea o le Alii ua tatou manuia ai. O le Talalelei folafola, ua tatou maua ai le suiga fou i le ola auauna i le Atua.

04 – 10 Aperila 2021

Aso Sa Toetu

Tusi Faitau: **Galuega 10 : 34 – 43**

Manatu Autu: **“O le ola fou ia Keriso”**
(New life in Christ)

Faafetai:

Mo le Eseta, o le faamanatuina o le alofa faaola o le Atua. Mo lenēi aso faailogaina, mo e ua talitonu ma le faamaoni i le Atua.

Faatoesega:

Ona o le tosina o tatou loto i mea o le lalolagi, e faamanatu ai le Eseta. Ua le atagia le uiga o le Eseta i o matou olaga, ona o loo matou faasatauroina pea Keriso i o matou uiga faaalua i isi tagata. Ua tatou le lagonaina, o lona toetu o le faailoga o le manumalo ia Keriso.

Manaoga:

Ia pa'i mai lou Agaga Paia e fanaufouina o matou loto i lenei Eseta. Ia fafagaina o tatou loto i le areto mai le lagi, ma faainu i tatou i le vai o le feagaiga fou i lona toto. Ia tupu tele le malamalama o le lalolagi i le tala ia Iesu Keriso, na toetu mai nai le oti.

11 – 17 Aperila

Tusi Faitau: **Luka 15 : 1 – 3, 11 – 32**

Manatu Autu: **“O le uii loto salamo:**
(The prodigal son)

Faafetai:

Ona o le atamai e iloa ai le leaga ma liliu ese ai. Mo le loto salamo, o le avanoa mo le tagata agasala e toe faalelei ai ma le Atua le Tama.

Faatoesega:

Ona o le ola fiapule o le tagata, ua le fia foi i le Atua. ua mama i manatu le uiga o le salamo.

Manaoga:

Foai mai le loto salamo, tatou te foi ai e faatoesese ma faamaulalo ia te Ia. ia foai mai le potu, tatou te iloa ai le leaga ma liliu ese ai.

18 – 24 Aperila 2021

Tusi Faitau: **Luka 9 : 51 – 62**

Manatu Autu: **“Aua nei toe tepa i tua:**
(Don't ever look back)

Faafetai:

O le valaauina o le tagata e fai ma auauna galue mo le faatinoina o lou finagalo i le lalolagi. O le poto ma le malamalama ua foai mai i le tagata e filifili ai mo mea lelei. O le musumusuga a le Agaga Paia o loo fai ma faamalosi'au mo le tagata ia agai pea i luma, e feagai ma faigata o le ola ofoina.

Faatoesega:

O le le lava o le ola faautatua o le tagata, e filifilia ai mea e manuia ai. O le sese soo o le tagata i ana filifiliga mo le Alii, ua mafua ai faigata ma puapuaga ua fesouaina ai lona ola.

Manaoga:

Ia fesoasoani mai le Atua i o tatou vaivai, ma aumai le lototele e finauina ai Manuia mo lana Tala Lelei. Ia faapupulaina mata o matou agaga i le leaga o le faalotolotolua. Ia taitaiina pea i matou e lou Agaga Sa, ina ia tonu o matou ala i ou luma.

25 Aperila – 01 Me 2021

Tusi Faitau: **Ioane 20 : 19 – 31**

Manatu Autu: **“E tonu ma faamaoni poloaiga a le Alii:**
(The Righteousness of God)

Faafetai:

Ua aoao mai le loto masalosalo o Toma e faatonu ai o matou loto i ai le mautinoa. I le galuega faale-talalelei, ua tovā ai le loto femasalosaloai. O le malamalama o le Talalelei, ua aveesea ai le loto masalosalo i le Alii. I le au faievagelia, ua molimau mai i le toetu o Iesu.

Faatoesega:

Ona o lo tatou ola masalosalo i le toetu mai o Iesu. Ona o lo tatou ola le faamaoni, e tausia ai poloaiga a le Alii.

Manaoga:

Ia fesoasoani mai le Agaga Paia, na te faamalosia le ola talitonu ia Iesu Keriso. Ia fai ma faamalosi mo e mafatia, le toetu mai o Iesu. Ia faatumauina i o tatou loto le talitonuga, e faamaoni le Alii.

02 - 08 Me 2021

Tusi Faitau: Salamo 23 : 1 6

Manatu Autu: “O le Leoleo alofa”
(The Watcher)

Faafetai:

Ona o le taitaiga a le Leoleo sili o loo malutia ai le maloloina o tagata uma. Ona e ui e tele vanu i le ala, ae o loo to’ia pea tatou i le tele o faamanuiaga i soo se auala, ona o lona aao faaola mai.

Faatoesega:

Ona e tele ina galo ia i tatou le o loo leoleoina lo tatou saogalemu. Ua tatou le faamoemoe i le Alii i le tele o taimi o la tatou folauga, e mafua ai ona laveia gofie tatou i mailei a le fili.

Manaoga:

Ia fesoasoani mai pea lo tatou Leoleo alofa i la tatou faigamalaga faaaau. Ia tumau ia Samoa ma ona tagata le faamaoni o le Alii le Leoleo lelei, e manuia ai laasaga uma o feagai ai. Ia faamanuia le Atua i le alo atu o Tina uma o Samoa ma le lalolagi i le faamanatuina o le Aso o Tina o lumanai ai.

09 – 15 Me 2021 **Aso Sa o Tina/Vaiaso Muamua Fono i Malua.**

Tusi Faitau: **Galuega 9 : 1 20**

Manatu Autu: **“Faalogo ma mulimuli i le Faasinogatonu”**
(Take heed and follow His lead)

Faafetai:

Ona o le avanoa ua ia faaaogaina ai le tagata sa aaitui i lana galuega. Ona o le alofa faa-Tama, ua faasinoina i ai le tagata i ala tonu. Ona o le amanaia o le tagata faatauva e faasalalau ai lana Talalelei.

Faatoesega:

Ona o le faaaoga sese o lo tatou malosi i mea leaga ma mea mataga. Ona o le faigata ona tatou iloa o le mea sese o loo o tatou faia. Ona o le pogisa o la tatou vaai i le faasinoga e tataua ona tatou mulimuli ai

Manaoga:

Ia faatuputeleina le loto talitonu o tagata i le Atua. ia faamalamalamaina loto o e ua le talitonu i le Atua. ia faamanuia le taape ai o le Fono Tele i le faaiuga o le Vaiaso.

23 – 29 Me 2021 **ASO PENETEKOSO**

Tusi Faitau: **Galuega 2 : 1 – 13**

Manatu Autu: **“O le Agaga Paia”**
(The Holy Spirit)

Faafetai:

O le fesoasoani a le Agaga, o loo musumusuina le tagata e fai le amiotonu. O le mana o le Agaga Paia ua mafai ai ona faasalalauina atu le tala lelei.

Faatoesega:

O loo teena pea e loto le musumusuga a le Agaga Paia. Ua tele ina faauiga sese le galuega a le Agaga Paia. Ua tele ina tatou tautala i le Agaga Paia, ae ua mulimuli pea i ala o le lalolagi.

Manaoga:

Ia tautoaluaina pea i tatou e le Agaga Paia, nei iuvale lo tatou faamoemoe mo le Alii. Ia foi mai le mana tatou te iloaitino ai le faatasi mai o le Agaga Paia. Ia i ai le mana o le Agaga Paia, na te faamanaina taitaiga o malo, nuu aemaise lana Ekalesia.

30 Me – 05 Iuni 2021**Vaiaso Tutoatasi o Samoa****Tusi Faitau: Ioane 17 : 20 – 26****Manatu Autu: “Tasi i le Alii”**
*(One in the Lord)***Faafetai:**

O le fa’aaliga i le matagofie o le tau e maua e i latou ua faamaoni e tausii ana afioga. O loo avanoa pea le ala tatou te savavali atu ai i le mafutaga faatasi ma Ia. Ona o e ua galulue faamaoni mo le Alii.

Faatoesega:

Ona o lo tatou ola faafoliga. Ua le atagia ia i tatou foliga o le Alii.

Manaoga:

Ina ia faamalosi mai le Agaga Paia, i la tatou molimau i le finagalo o le Alii. Ina ia tasi tagata uma i le tino, mafaufau ma le agaga, i le alofa o le Alii. Ina ia taitai ma faasino tatou, ina ia faia mea uma i le alofa ma le faamaoni.

06 – 12 Iuni 2021

Tusi Faitau: **Faaaliga 21 : 22 – 27**

Manatu Autu: **“O le nuu e leai se moli ae malamalama”**
(A city with no lights, yet shineth)

Faafetai:

O le malamalama o le Atua o loo faamalamalamaina ai le pogisa. O le pupula o le Alii ua mafai ai ona maua le potu ma le atamai i le tala ia Iesu

Keriso.

Faatoesega:

O loo tatou tetee pea i le malamalama o le Atua ona ua fiafia e tumau i le pogisa. O le vaivai o le ola ofoina mo le galuega tala’i o le faaolataga. Ua tatou vaoia le susulu atu o le malamalama o le Atua i tagata.

Manaoga:

Ia faasusulu mai e le Atua lona lava malamalama tele, ina ia sulugia ai loto faigata o tagata. Ia le avea le iloa faalelalolagi e faasese ai le malamalama o le upu moni a le Atua, ia le tautevateva ai la tatou savali.

13 – 19 Iuni 2021

Tusi Faitau: **Salamo 8**

Manatu Autu: **“O galuega mamana a Ona aao”**
(The works of Thy hands)

Faafetai:

I galuega ofoofogia a le Atua ua siomia ai le tagata. O le mafaufau ma le malosi ua tuuina mai e le Atua i le tagata, e ola ai i le lalolagi. Ona o mea lelei ua faia e le Atua, mo le manuia lautele.

Faatoesega:

Ua manatu faatauva le tagata i le tele o galuega lelei na faia e le Atua mo lona ola lelei. Ua soona fai e le tagata le tamaoaiga na aumaia e le Atua. Ona o le faatautala o le tagata, ua faaleagaina ai le foafoaga a le Atua.

Manaoga:

Ia naunau o tatou loto i le Atua, ina ia faia ai mea lelei mo le manuia. Ia lafoai mai iloa faale-Atua, tatou te iloa lelei ai le leaga o faiga a Satani, ua faaleagaina ai le lalolagi matagofie. Ia fesoasoani mai le Agaga o le Atua, ia matua lagona e le tagata le mamalu o le Atua na ia faia ai le lagi ma le lalolagi.

20 – 26 Iuni 2021

Tusi Faitau: Kalatia 3 : 23 – 29

Manatu Autu: “Galulue faatasi e manuia ai”
(Unity brings prosperity)

Faafetai:

Ua avea tatou ma fanau a le Atua, e ala i le faatuatua. Ua tutusa tagata uma i le alofa o le Atua. O le alofa faa-tama o le Atua ua faailoa mai e le Tusi Paia.

Faatoesega:

O lo tatou le faamaoni e tauave tiute ma matafaioi, ua valaauina i ai tatou e le Keriso. Ua tatou faatamala i o tatou tiute faa-tamā, ua tupu ai le le fealofani. Ua le faatinoina o tatou tiute i totonu o lana Ekalesia.

Manaoga:

Ia foai mai ia te i tatou le loto e galulue faatasi ai mo le manuia, ma maua ai le soifua fetausiai. Ia maua e o tatou Taitai le Agaga o le Atua. ia maua e le Ekalesia le tasi ia Keriso.

27 Iuni – Iulai 2021

Tusi Faitau: **Kenese 47 : 1 – 10**

Manatu Autu: **“Alofa i matua ma aiga”**
(Love our parents and families)

Faafetai:

Ona o le alofa e galo ai tiga ua tuanai, mo le manuia o aiga. Ona o le galuega mana a le Agaga Paia, ua faaleleia aiga, nuu ma ekalesia i lona suafa.

Faatoesega:

Ona o lo tatou toilalo pea i le ita, ua sese ai a tatou faaiuga. Ona o lo tatou le saili fesoasoani i le Atua i mea tatou te manaomia. Ona o lo tatou le fefaasoa’i ma isi tagata i faafitauli e tutupu mai.

Manaoga:

Ia teu fatu i o tatou loto le alofa moni i o tatou matua ma aiga, e maua ai le fealofani. Ia faamagalo atu i e agaleaga mai, o le meaalofa taua lea mai le Atua. I le Atua, ia tatou lagonaina lona alofa mai, e ala ia Iesu Keriso lona Alo pele.

4 – 10 Iulai 2021

Tusi Faitau: **Esoto 20 : 1 – 17**

Manatu Autu: **“Tulafono a le Alii”**
(God’s commandments)

Faafetai:

I lona alofa moni, na aumai ai tulafono tatou te ola ai, e maua ai le fealofani. Ona o lona alofa tunoa, o le avanoa e toe fuataina ai o tatou olaga.

Faatoesega:

Ona o lo tatou solia pea o tulafono, pe a feteenai ma o tatou manatu. Ona o lo tatou tusitusilima i isi tagata, pe a o latou soli tulafono. Ona o lo tatou ola tuinanau.

Manaoga:

Ia afio le Agaga o le Atua i o tatou loto, tatou te iloa ai mea o tatou vaivai ai. A tatou agasala i luma o le Atua, ia tatou maua le salamo e faatoese ai i le Atua, ma suia o tatou ala. Ia tausi ma anaana i tulafono a le Alii, e maua ai lona alofa tunoa, ma ana meaalofa e tele.

11 – 17 Iulai 2021

Tusi Faitau: Levitiko 20 : 9 – 16

Manatu Autu: “O le tau i o le agasala, o le oti”
(The consequence of sin, is death)

Faafetai:

Ona o lana faasinoga tonu, ua manino ai amioga e fiafia i ai le Atua. Ona o le saolotoga ua tuuina mai, ua atiae ai aiga, nuu ma atunuu, ina ia viia ai lona suafa. Ona o le tele o lona tamaoaiga ma ana meaalofa, lea ua tatou sapi ai nei.

Faatoesega:

Ona ua tatou faaaoga ana meaalofa, e saili ai o tatou viiga. Ona ua tatou pule ma le sau i le foafoaga na faia e le Atua. Ona o lo tatou le ava i matua, ma e matutua.

Manaoga:

Ia ola fefaasoa’i le lalolagi i le alofa, aemaise lava e o manaomia le fesoasoani. Ia tatou faatumauina le ola lelei o le foafoaga a le Atua. Ia tatou maua le faamaoni ma le amiotonu a le Atua.

18 – 24 Iulai 2021

Tusi Faitau: **Numera 12 : 1 – 16**

Manatu Autu: **“Usitai i auauna a le Atua”**
(Obey the servants of God)

Faafetai:

Ona o le toamalie o Mose, a’o tetee mai lona uso o Arona ma lona tuafafine o Miriama. Ona o le faamasinoga tonu a le Atua, e maua ai le tali. Faafetai i lona alofa tunoa, ua talia ai la tatou tatalo.

Faatoesega:

Ona ua afaina le valaauina o niisi, ona o a tatou upu soona lafo. Ona o le faatauvaa o la tatou vaai i o tatou tof, omeaalofa mai le Atua. Ona o le manatu faamaualuga, ua tatou le iloa ai le tele o tatou vaivaiga.

Manaoga:

Ia faatino o tatou tiute uma ia lelei, ia manuia ai o tatou aiga, nuu ma ekalesia. Ia fesoasoani mai le Agaga, ia aveesea ia i tatou le ola faitiio. O auauna ua tofia e le Atua, ia tatou lagolago ma usitai i ai, e ala mai ai lo tatou manuia.

25 – 31 Iulai 2021

Tusi Faitau: **Teuteronome 8 : 1 – 9**

Manatu Autu: **“Ne’i galo le Alii”**
(Lest you forget the Lord)

Faafetai:

Ona o lana taitaiga alofa, na fagaina ai lona nuu toatele i le vao, i tausaga e tele, ma puipi mai i fili eseese. Ona o vavega e tele sa faia e le Atua, na iloa ai e Israelu o le Alii, o le Atua soifua. Ona o ana poloaiga ua tuuina mai, e ola fialia ai tagata uma.

Faatoesega:

Ona o lo tatou le manatu mamafa i fanua ma eleele, o o tatou tofi mai le Atua. Ona ua galo i le nuu le alofa tunoa, na le pala ai pe leaga o tatou ofu.

E ui ina muimui le nuu i le vao, ae na taunuu lava i le nuu folafolaina.

Manaoga:

Ina ia mausali lo tatou faamoemoe i le Atua, e le seetiagofie ai i faaosoosoga ma tofotofoga. Ina ia aumai le lototele e taofi mai ai lo tatou talitonuga, o le Atua, o lo tatou malu i aso uma. Ia mau o tatou loto ma faatuatua i le Atua, ona tatou maua lea o ana meaalofa e tele.

01 – 07 Aokuso 2021

Tusi Faitau: Iosua 7 : 1 – 15

Manatu Autu: “Aua e te gaoi”
(*Do not steal*)

Faafetai:

Ua taunuu manuia fuafuaga uma a le tagata, ona o lona alofa. Ona o meaalofa ma le sosia sasaa mai o le Atua mo i tatou i aso uma. Ua tatou fefaasoa’i i nei meaalofa, mo le manuia o aiga.

Faatoesega:

Ona o lo tatou manatu e faamalie o tatou tuinanau, o le faapogai o le gaoi. Ona o i tatou o tagata agasala. Ua olaola i loto le manatu faapito aua e afaina ai isi.

Manaoga:

Ina ia fesoasoani mai le Agaga Paia ia maua le loto fefaasoa’i e galulue faatasi ai. Ia tatou lagona le matagofie o le alofa atu i isi tagata. Ia taulamua lona Agaga i fuafuaga uma, e aveesea ai mafaufauga sese.

08 – 14 Aokuso 2021

Aso Sa Tama/Suega Ulufale Malua

Tusi Faitau: **Faamasino 11 : 29 – 36**

Manatu Autu: **“Faatino mea ua e folafola i le Alii”**
(Fulfil your vows to the Lord)

Faafetai:

Ona o le Atua tali manao i mea tatou te mananao ai. Ona o le lototele ma le faatuatua o Iefata, na faaolaina ai lona nuu i aso faigata. Ona o le faaaoaga o i tatou e fai ma ana mea faigaluega e viia ai lona suafa.

Faatoesega:

Ona o le le taunuu o mea tatou te folafola i le Atua. E i ai foi taimi e matua leai lava se mea e faatino, o mea sa tatou ofoina atu i le Atua. Ona o lo tatou manatu mama i nisi taimi, i a tatou folafolaga i le Alii.

Manaoga:

Ia tatou maua le lototele e faatino ai mea ua tatou folafola i le Atua. Ina ia pulea o tatou loto e lona Agaga, tatou te iloa ai mea e folafola atu. Ia taitaiina i tatou ia maua le ola felagolagomai.

15 – 21 Aokuso 2021

Tusi Faitau: **Ruta 1 : 11 – 22**

Manatu Autu: **“O le Alofa Moni”**
(True Love)

Faafetai:

Ona o le alofa faa-tina o Naomi i ava a lana fanau. Ona o le alofa moni o Ruta ia Naomi, i le tulaga pagatia ua o’o i ai, na finau ai la te o faatasi i Peteleema. Ona o le faatasi mai o le Agaga, tatou te lagona ai le alofa moni i e o mafatia i faigata.

Faatoesega:

Ona o le ogaoga o puapuaga o isi tagata, ae leai se fia fesoasoani i ai o isi. Ona o le faafitauli e tutupu i nisi, ua tatou fiafia, ae le fesoasoani i ai. Ua vaivai o tatou tiute faa-matua mai le Atua.

Manaoga:

Ia tatou fesoasoani i faafitauli o e ua tatou tuaoi, aua o latou nei, ae o taeao i tatou. Ia mafai ona tatou alolofa atu i e puapuagatia. Ia toatele nisi e pei o Ruta, i lona alofa moni ia Naomi.

22 – 28 Aokuso 2021

Tusi Faitau: **1 Samuelu 8 : 1 – 9**

Manatu Autu: **“Ua naunau Isarelu i so latou tupu”**
(Israel calls for a king)

Faafetai:

Ona o le tausiga a le Atua i lona nuu, amata mai i Aikupito, lea lava e faaaau. Ona o le alofa faapalepale o le Atua.

Faatoesega:

Ona o lo tatou osovale i mea e foliga e lelei i la tatou vaai, ae le fesili muamua i le Atua. O lo tatou ola finauvale, ae tuu le finagalo o le Alii. Ona ua tatou mamao ese ai ma le alofa tunoa o le Atua.

Manaoga:

Ia tatou mataala i manatu ma faiga eseese e o’o mai i lo tatou olaga, ne’i o tatou sese ai i luma o le Atua. Tatou fiafia e tatalo e maua ai le tali mo tatou faafitauli. Ia tatou manatua, o le Atua lo tatou Tupu ma le Taitai sili, o le Atua soifua lea.

Tusi Faitau: **Neemia 5 : 1 – 13**

Manatu Autu: **“Ia lototele ma faamalolosi i le finagalo o le Atua”**

(Be strong and be courageous in God’s work)

Faafetai:

Ona o lona Agaga ua fai ma faamalosia’au i le galuega a le Talalelei. Ona o le lototetele na faailoa mai e Neemia ma taitai o Iuta. Ona o le loto fia fai measili o ona tagata.

Faatoesega:

Ona o lo tatou faalogo i upu faavaivai loto. Ona ua le faatino lo tatou valaauina i le lelei e gata ai.

Manaoga:

Ina ia manumalo pea le finagalo o le Atua i o tatou loto, ae aua le faalogo i upu sese. Ia tatou lototetele i le Talalelei i le fesoasoani mai o le Atua. Tatou fesili i le Atua e ala i le tatalo, tatou te maua ai malosi mo lana Tala e lelei.

05 – 11 Setema 2021

Tusi Faitau: **1 Tupu 21 : 1 – 16**

Manatu Autu: **“Ua agasala le manao”**

(Sinful Desire)

Faafetai:

Ona o le faasoa poto a le Atua ua manuia ai aiga uma. Ona o le ola toaga e atiae, aua lona aiga, ma lana tautua mo le Atua. Ona o le laueleele ma ona manuia ua tatou maua.

Faatoesega:

Ona o lo tatou augatata e galueaina o tatou fanua ua aumai e le Atua. Ona o auala sese ua faia ua faoa ai meatotino a isi tagata. Ona o amioga le taupulea ua tatou faia, ua vevesi ai tagata.

Manaoga:

Ia fesoasoani mai le Atua, ia tatou iloa le leaga o le ola tuinanau. Ia fesoasoani mai le Agaga, ia fetala'i o tatou loto i mea e manuia ai.

12 – 18 Setema 2021

Tusi Faitau: Esera 1 : 1 – 11

Manatu Autu: “**Toe fausia le malumalu i Ierusalema**”
(Rebuilding the temple in Jerusalem)

Faafetai:

Ona o avanoa ua tatou tapuai ai i ona malumalu. Ona o le tamaoaiga ala eseese ua faatino ai le soifua galulue. Ona o loo aoao mai afioga a le Atua, e faamaite ai le ola faitaulaga o tagata.

Faatoesega:

Ona o lo tatou tetee i ala e atiae ai le galuega a le Atua. Ona o le le faaaogaina tatau o avanoa e maua ai faamanuiaga mai le Atua. ona ua fai o tatou loto, ae tuu lona finagalo.

Manaoga:

Ia faaoga tatau avanoa mai le Atua, e tapue mai ai aiga ma nuu, ina ia manuia. Ia mafai ona galulue faatasi tagata uma, e faaleleia mea uma o manaomia. Ia tatou faaoga tatau malumalu e vivii ma tapuai ai i le Atua,.

19 – 25 Setema 2021

Tusi Faitau: 1 Nofoaiga Tupu 10 : 1 – 7

Manatu Autu: “E pule aoao le Atua”

(God’s sovereignty)

Faafetai:

Ona o Taitai na tofia e le Atua, mo le manuia o ona tagata. Aua ua tatou ola ma le maunoinoa, e pule aoao le Atua ia i tatou.

Faatoesega:

Ona o lo tatou ola fia pule. Ona faatoa manatua le Atua i taimi o faafitauli. Ona o lo tatou faamaualuluga.

Manaoga:

Ia fa’aaoga tatau aso uma o lo tatou ola e viia ai le Atua. Ia faatumauina le pule aoao a le Atua i mea uma.

26 Setema – 02 Oketopa 2021

Tusi Faitau: 2 Nofoaiga Tupu 9 : 1 – 12

Manatu Autu: “O le tamaoaiga ma le atamai mai le Atua”

(Treasures and wisdom from God)

Faafetai:

Ona o ana meaalofa o le atamai ma le tamaoaiga. Ona o meaalofa a le Atua i o tatou olaga, ua amanaia ai i tatou e tagata. I le fa’aaogaina o ana meaalofa, ia viia ai lona suafa.

Faatoesega:

Ona ua tatou fa’aaoga sese le atamai mai le Atua. Ona o lo tatou teena o le tele o meaalofa mai le Atua. Ua tatou faaleagaina meaalofa a le Atua ona o le agasala.

Manaoga:

Ia foai mai le poto ma le atamai, le faautauta ma le loto matala i mea uma. Ia tatou faaoga tatau meaalofa a le Atua, mo lona viiga. Ia fesoasoani mai le Atua, ia tatou faaoga lelei ana meaalofa, e tupu tele ai lana Talalelei.

03 – 09 Oketopa 2021

Tusi Faitau: **2 Tupu 5 : 1 – 14**

Manatu Autu: **“Ua malolo Naamanu”**
(Naaman healed)

Faafetai:

Ona o le teineitiiti na maua ai e Naamanu le tala i le mana faaola o le Atua. Ua lagona e Naamanu le tala i le Atua. Ona o Elisaia le perofeta, na auala mai ai le faamalologa a le Atua.

Faatoesega:

Ona o lo tatou loto faamaualuga e pei o Naamanu, tatou te talia gata ai le faaolataga mai le Atua, lea na malolo ai lona lepela. Ona ua soona fai ana meaalofa na tapena mo tatou. Ona o le tatou popole vale i aso faigata.

Manaoga:

Ia fesoasoani mai lo tatou ola faatuatua, e fai ma o tatou maluapapa i aso uma. Ia tatou lototetele ma faamalolosi i o tatou tiute ma tofi. Ia amanaia le taulogologo a nai a tatou fanau, o meaalofa mai le Atua.

17 – 23 Oketopa

Tusi Faitau: Eseta 2 : 1 – 7

Manatu Autu: “Ua Masiofo Eseta”
(*Esther the Queen*)

Faafetai:

Ona o le avea ai o Eseta ma masiofo a Asueru, o avanoa nei mai le Atua e faaola ai i lona nuu. Mo avanoa ua tatou maua, e Taitai ai aiga, nuu, ekalesia ma malo, ina ia manuia ma viia ai lona suafa.

Faatoesega:

Ona o lo tatou faaoga sese o avanoa mai le Atua, e faia ai o tatou loto, ae tuu lona finagalo. Ona o lo tatou toilalo pea i vaivaiga masani. Ona ua tatou faia pea le tuinanau e malaia ai.

Manaoga:

Ia lagona e tagata uma le taua o avanoa mai le Atua. Ia lagona e tagata uma le faasoa atu o meaalofa ua tatou maua, ae aua tatou te manatu faapito.

24 – 30 Oketopa 2021

Tusi Faitau: Iopu 7 : 1 – 14

Manatu Autu: “O mafatiaga o Iopu”
(*The sufferings of Job*)

Faafetai:

Ona o le faatuatua o Iopu na mafai ai ona finau pea ma tali tiga. E iai taimi e oo mai ai ona o le loto onosai, e tali ai faitioga ma tuuaiga i le suafa o Iesu Keriso. I le faasoa mai o mafatiaga o Iopu, e tapena ai foi o tatou olaga i taimi faigata.

Faatoesega:

Ona o lo tatou fiu gofie ma faalogologo tiga, i faafitauli tatou te feagai ae le'i Taitai oo i tiga. Ona ua avea i tatou ma e faavaivai i nisi o uo, a'o feagai ma faafitauli.

Manaoga:

Ia tatou lototele ma faamalolosi, e mafai ai ona tatou manumalo i faafitauli tatou te feagai. I le Agaga, ina ia tatou maua le faamaoni ma le amiotonu, e faatinoina ai o tatou tiute. Ia tatou faamalolosi i lo tatou valaauina, ui ina faigata lo tatou valaauina, e taunuu manuia ai i le ola faavavau.

31 Oketopa – 06 Novema 2021

Tusi Faitau: Salamo 23

Manatu Autu: “O le Leoleo Mamoe lelei”
(The Good Shepherd)

Faafetai:

Ona o lana leoleoga alofa mo i tatou talu mai le amataga. O lona faatasi mai o loo tautoaluina i tatou, i taimi o le vaivai. I le faasoā a le Atua i lona tamaoaiga, i tofi ma tiute mo lona finagalo.

Faatoesega:

Ona ua agalelei mai le Atua i aso uma, a ua tatou le agalelei atu i tagata o manaomia la tatou fesoasoani. Ona e tele faiga lelei a le Atua i o tatou olaga, ae tatou te le fiafia e faataitai ma ola ai. Ona o lo tatou fiafia e talia meaalofa, ae augata e faasoā atu.

Manaoga:

I le alofa tunoa o le Atua, na te faasoā mai ai lona tamaoaiga. Ia alofa le Atua ma mafutaina i tatou i taimi faigata. Ia tatou faatuatua ma mautinoa, e le tu'una lava i tatou e le Atua.

07- 13 Novema 2021

Tusi Faitau: Teuteronome 12 : 2 – 7

Manatu Autu: “Ave i le Atua mea na e tauto ai”
(Give God what you promised)

Faafetai:

Ona o le tele o mea ua Ia foaiina i o tatou lima e tausia ai le ola manuia o aso uma. Ua avea tautoga ua tatou faia, e faamanatu mai ai le taua o le ola i le va o ulugalii, aiga, aemaise o le valaauina i ana feau ma lana galuega. Ona o le faolataga, o le taulaga sili na tauto ai le Atua ina ia ola le tagata agasala.

Faatoesega:

Ona o le le taunuu o mau folafolaga ua tatou faia, ona o le ola le faamaoni, aemaise ona ua tupu le manao tele. Ua tatou le iloa ona ofo mo le Atua mea ua tatau, ina ua pupu o tatou loto i mea faatauvaavaa e fano ai.

Manaoga:

Ia fesoasoani mai lona Agaga e faatupu lo tatou fiafia, e ofo taulaga ua lelei ma malie mo le Alii. Ia faapaia mai e le Atua faigataulaga o lenei tausaga, o mea na tatou tauto ai ia te Ia. ia faamanuia le Atua i le sauni o fanau aoga mo suega faaiua o lenei tausaga.

14 – 20 Novema 2021

Tusi Faitau: Failauga 2 : 1 – 11

Manatu Autu: “A aunoa ma le Atua, e faatauvaavaa mea uma”
(Without God, all is vanity)

Faafetai:

Ona o lona atamai na te faasoa mai ai mea tatou te moomia i aso uma. Ona o le auala eseese mai o ana faamanuiaga, ua tofusua ai tatou. Ona o le malosi Faafouina mai le Atua i aso uma, e fai ai lana galuega nei.

Faatoesega:

Ona ua fa'aaoga sese a tatou taleni ma meaalofa mai le Atua. Ona ua le mafai ona fai le mea silisili mo le Atua. Ona ua tatou fao le viiga o le Atua.

Manaoga:

Tatou talosia o tatou olaga, ia faamuamua ai pea le Atua. Ia aumai le ola ma le malosi e faatino ai lana galuega. Tatou faafoi le viiga i le Atua e ala i a tatou osigataulaga, i mea ua tatou maua.

21 – 27 Novema 2021

Tusi Faitau: **Pese a Solomona 1 : 1 – 4**

Manatu Autu: **“O le alofa o le Atua”**
(God's love)

Faafetai:

Ona o le alofa faamaoni o le Atua ia i tatou. Ona o le alofa o lo'o manuia ai aiga, nuu ma ekalesia.

Faatoesega:

Ona o le fa'aaoga sese o ana meaalofa. Ina ua tatou faatalale i taleni ma meaalofa mai le Atua.

Manaoga:

Ia maua e tagata uma le alofa o le Atua, e faavae ai mafutaga. Ia amata i totonu o tatou aiga le alofa.

28 Novema – 04 Tesema

Tusi Faitau: **Isaia 1 : 1 – 19**

Manatu Autu: **“Manatua le Atua**
(Remember the Lord)

Faafetai:

Ona o le musumusuga a le Agaga e faamanatu mai ia tatou iloa ona manatua le Atua i aso uma. Ona o le tatalo, tatou te fesootai atu ai i le Atua. Ona o lona alofa e ala i lona Alo e toatasi, ina ia tatou sao i lona manuia e faavavau.

Faatoesega:

Ona ua tatou le manatua pea le Atua. Ona ua tatou le iloa le Atua ua na tausia i tatou. Ua tatou toilalo i le agasala.

Manaoga:

Ia faamuamua le Atua i mea uma o lo tatou olaga, ona manuia lea o ō tatou tiute uma. Ia manatua lana tulafono, o le sulu i o tatou vae ma le malamalama i o tatou ala.

05 – 11 Tesema 2021

Tusi Faitau: **Ieremia 17 : 12 – 18**

Manatu Autu: **“Ia faatuatua i le Atua”**
(Trust in the Lord)

Faafetai:

Ona o ana perofeta ua faamanatu mai le taua o le ola faatuatua i le Atua, ma ana Tulafono, nei maumau o tatou agaga i le pogisa. Ona o lona faapalepale ua avanoa le toe fuata’ina o lo tatou ola, mai agasala ma sese.

Faatoesega:

Ona o lo tatou lafoai o le Atua moni, ae mulimuli i mea mamate o lenei olaga. Ona o lona alofa tunoa talu mai le amataga, a ua le tusa ai ma lo tatou faatamala, ua tatou leiloa ai lona alofa.

Manaoga:

Ia tumau pea le alofa o le Atua, tatou te faia ai lona finagalo. Tatou talosia le lalolagi uma ia faatuatua ma matatau i le Atua.

12 – 18 Tesema 2021

Tusi Faitau: Auega 5 : 1 – 21

Manatu Autu: “Ia tatalo e le aunoa”
(Be prayerful)

Faafetai:

Ona o lona aoaoina o tatou i le tatalo. Ona o le tatalo o augatamā ua mavae, asaina ai le gasu o manuia mo aso nei.

Faatoesega:

Ona o lo tatou augatata e tatalo. Ona ua tatou faasaga i mea le aoga ae galo le Atua, o le puna o manuia ma mea lelei uma.

Manaoga:

Talosia le ola tatalo o le lalolagi uma, ia fefaamafanafanaa’i ai i taimi faigata. Tatalo i le Atua ia aveesea mafaufauga ma manatu sese mai o tatou olaga.

Tusi Faitau: Tanielu 4 : 1 – 10

Manatu Autu: “E silafia e le Atua miti uma”
(*God knows all our dreams*)

Faafetai:

Ona o le fesoasoani a le Agaga, e faatino ai tiute o le au faatuatua. I le Atua ona ua na faailoa mea tatou te le iloa. Faafetai i miti lelei o lenei tausaga a mavae atu.

Faatoesega:

Ona o mea ua sese ma faaletonu i lo tatou faatamala. Ona o le fia fai o tatou loto i mea e le o’o i ai so tatou iloa.

Manaoga:

Ia tatou fiafia e tatalo ma anapogi e le aunoa. Ia fesoasoani mai le Atua, ina ia tatou fiafia e fesili ia te Ia, i mea ua tatou le iloa. Ia manuia i’u o lenei tausaga i lou faatasi mai.

O le faanaunauga sili o le Leoleo Mamoe Sili, mo le Ekalesia ma o tatou tagata, ia faatu lona malo i o tatou loto.

Soifua ma ia manuia